

TOLIARA, IHOSY, AMBALAVAO, FIANARANTSOA

Akaiky ny fototra sy ny vahoaka hatrany Ravalo

Naharitra herinandro teo, ny fitsidihan'ny Filoha Marc Ravalomanana ny tany amin'ny lalampirenena faha-7 (RN7) iny hatrany Toliara, nanatanterahana ny fameloma-maso ny antoko TIM tany amin'ny faritra Atsimo Andrefana no tena nifantohan'izany, teo koa no fanamarihana ny tsingerin-taona nahaterahany, niarahana tamin'ireo mpikatroka any ifotony any Toliara, na teo aza ny sakantsakana nataon'ny fitondrana tamin'ny alalan'ireo mpitantandro filaminana. Tany Ambalavao, nihaona mivantana tamin'ny vahoaka teny an-tsena i Dada. Tany Ihosy sy Fianarantsoa, nihaona tamin'ireo mpitarika ny antoko tao amin'ny renivohitry ny faritra Ihorombe sy Matsiatra Ambony izy, ho fanomanana koa ny fameloma-maso ny antoko any amin'ireo faritra ireo. Midika ireo rehetra ireo fa akaiky ny vahoaka sy ny fototra hatrany ny filoha nasionalin'ny antoko TIM sady filohan'ny Rodoben'ny Mpanohitra ho an'ny demokrasia eto Madagasikara (RMDM). Fa tany amin'ny renivohitry ny faritra Atsimo Andrefana, tsy nahasakana ny famelomamaso na redynamisation ny antoko Tiako i Madagasikara (TIM), tany Toliara faritra Atsimo Andrefana tsy ho tanteraka ny sakantsakana, sy ny ramatahora nataon'ny tompom-pahefana eto amin'ny firenena. Marihina fa nosakanan' ny fanjakana tamin'ny fomba rehetra ny fety saika nankalazana ny andro nahaterahan'ny filoha Marc Ravalomanana ny alahady 12 desambra lasa

teo, tao amin'ny Magro Andaboly. Teo ny fampiasana ny mpitantandro filaminana tamin'ny fampiasana fitaovam-piadiana mahery vaika sy ny baomba mandatsa-dranomaso tsy nahafahana nitsofoka tao amin'ny Magro na fananan'ny filoha Marc Ravalomanana manokana aza io toerana io. Tonga maro tany an-toerana nanotrona ny filoha Marc Ravalomanana ireo delegasiona avy aty Antananarivo toy ny depiote, ny birao politika nasionaly nanome voninahitra ny fotoana. Nandritra ny fandraisam-pitenenana nataon'ny filoha Marc Ravalomanana dia nanambara izy, fa ilaina ny firaisankina ; raha nisy ny disadisa teo aloha hoy izy dia avela daholo izany ankehitriny. Ilaina ihany koa hoy izy ny fanetren-tena sy fifankatiavana. Ho antsika rehetra dia manana finoana hoy izy, fa tsy maintsy mandroso i Madagasikara, indrindra i Toliara. Namafisin'ny filoha Marc Ravalomanana fa tsy mety ny CENI sy ny HCC amin'ny endriny izao io, ka ilaina hoy izy ny tokony hisian'ny fikaonandoham-pirenena na concertation nationale, izay hiantsoana ny ray amandreny ampanahy FFKM hitarika izany. Tsy hanaiky ny halabato intsony isika, ary tsy andefitra amin'izany mihintsy. Marihina fa nanome omby ny filoha Marc Ravalomanana natao ho nofon-kena mitam-pihavanana, ho mariky ny fihavanana eo amintsika rehetra izany hoy ihany i Dada.

Helisoa

Raharaha ady tany any Nosy-Be

Nosamborina, avy eo navotsotra i Ninie Donia

Raharaha ady tany any Nosy-Be, nosamborin'ny mpitantandro ny filaminana, avy eo navotsotra ny mpanakanto sady mpanao politika Ninie Donia, mpanakanto sy mpanao politika tsy manaiky ny tsindry hazo lena amin'ny fakana ny vahoaka madinika any Nosy-Be faritra Diana. Nosamborin'ny mpitantandro ny filaminana ary natao fanadihadiana tany amin'ny mpitantandro filaminana tany Fascène Nosy-Be i Ninie Donia

omaly. Fiarovana ny tamin'ireo vahoaka tsy ho alain'ny Siramona no anton'ny nisamborana azy raha ny fantatra. Tany izay kasaina hanaovana tetik'asan'ny Filoham-pirenena. Ankilany, tsy nanaiky ny fisamborana azy ireo vahoaka ao Nosy Be, ka nanao fitakiana ny hamotsorana azy. Navotsotra tokoa izy rehefa vita ny fanadihadiana nataon'ireo mpitantandro filaminana. Nisy ny fanambarana nataony tao aorian'izany."

Akory aly atsika aty amin'ny Gendarme Fascène zahay kela vita enquête, fa alaifa mody zegny ho Ro dia hita eo. Mitsangana atsika Malagasy fa tsy Rariny ai nefa procédure mbo mandeha nefa didy jadogno no misy aty Nosy Be. Resaka Tany Lay Raha niravaigny Lay Raha. Tiako atsika », hoy izy. Mbola ho tantara hitohy arak'izany ity raharaha ity.

Niaina




Ninie Donia, anisan'ny mpiaro ireo vahoaka madinika any Nosy-Be.

Fitondrana Rajoelina

Mampandry adrisa sy miziriziry

Mampandry adrisa sy miziriziry ny fitondrana Rajoelina, izany lohateny izany no malaza manerana ireo fokontany maro eto an-drenivohitra sy amin'ireo tanàn-dehibe sasantsasany manerana ireo distrika samihafa, araka ny fanadihadiana natao. Ny tian'ireo olona sendra anay sy nandefa feo taty aminay ambara dia hoe: Mampiesona ny fitondrana Rajoelina, manao ronono an-tavy sy manao be lazao fotsiny ihany, nefa tsy mahafantatra izay laharam-pahamehana amin'izao vanimpotoana sarotra iainantsika izao akory. Porofon'ny maro no nomen'ny olona, raha ny tany Toamasina ohatra dia hoe: manafatra simenitra ve no fiteny sa hitsaingoka eny ambony sambo eny? eo koa ny hoe : fanitarana ny seranan-tsambon'i Toamasina nefa hita sy tsapa fa fampiesonana fotsiny ho entimonomana fifidianana amin'ny 2023 indray, sady efa tetikasan'ny filoha teo



Teleferika, tsy hitondra tombontsoa ho an'ny rehetra akory.

aloha Rajaonarimampianina izany. Ny lalam-baovao "Auto route ", nilaza ireo sendra ny mpanao gazety, fa famahanan-dalitra tanteraka satria ireo fiara fitaterana tsy afaka hamono tena toy ny mpanao "Rallye" na fitaterambahoaka io na fitaterana entana goavana ka hanao 100km/ora, fa dia ny zanaky ny mpanana sy ireo mpanao fanenjika indray no mbola hahazo aina be eto, tsy aleo ve ny lalana

Vatomandry-Mahanoro no vonjena malaky, sady raha lalam-baovao mbola tsy misy tanàna azo antoka fa miharina na vao hitsangana amin'izany". Ny tany Toliara dia ireny efa hita porofon'ny ireny, fa "Kere " tokoa, ka lasa mifindra toerana any amin'ny ilany avaratra andrefana any, efa kivy amin'ny ataon-dRajoelina, ka aleony mitodi-doha indray aty amin-dRavalomanana sy ny mpanohitra rehetra

aty indray. Ny sekolim-panjakana any Toliara ohatra, ny EPP Beara, dia tsy misy na seza, na tabilao, trano falafa kely, ary zara raha mahazo karama ireo mpampianatra, nefa dia tsy fantatry ny mpanara-penitra hatramin'izao. Mazava izany fa manao be lazao, mitokana asa na zavatra tsy mbola vita zato isan-jato, nefa manampy-tsofina amin'ny vahoaka hatrany ry Rajoelina sy ny forongony. Ny eto Analamanga raha ny talata teo dia mahagaga, fa vao nomena fotoana nandray anjara tamin'ny fakan-kevitra momba ity teleferika ity ny mponina, nefa zavatra tokony efa natao tany aloha izany, mampandry adrisa tokoa hoy ny vahoaka. Ary ny vola hanaovana izany dia tsy Antananarivo ihany no hanefa azy, fa ny Malagasy iray mano ntolo mihitsy, nefa ny Renivohitra ihany no hisitraka azy, misy zavatra tsy rariny ao!

Beharo

Ny Valosoa sy fakafaka

Fitondrana Rajoelina mitanila Misy vahoaka darohana, misy vahoaka tambatambazana

Tsy ao anatin'izao fitondrana Rajoelina izao no antenaina hisian'ny fihatsaram-piainana ho an'ny saram-babem-bahoaka, raha ny fahitana ny zava-misy tato anatin'ny telo taona latsaka kely nitondrany. Tsy voafahiny ny fitontanam-bahoaka noho ny fahitana fa misy ampahana vahoaka tsy voatsinjony, mba tsy ilazana hoe ailiny na ataony anjorom-bala. Misy fijery mitanila miharihary raha tsy hilaza fotsiny afa-tsy ny tamin'ny zava-nitranga ny faran'ny herinandro teo, ny tao Vakinankaratra nisy an-dRajoelina sy ny tany Toliara nisy ny filoha Marc Ravalomanana. Misy vahoaka darohana sy aparitaka amin'ny entona manempotra na lakrimôzena, fa misy kosa vahoaka ampifalifaliana sy tambatambazana ary anaovana fampanantenana « bobaka », fampanantenana poakaty efa mahazatra. Misy olona manana raharaha tsy mazava, ary tokony hiakatra fitsarana, eo anivon'ny fitondrana toa mangatsiatsiaka sy milamindamina amin'izao fotoana izao, fa misy kosa olona, indrindra amin'ny antoko mpanohitra, vao misy hetsika kely ataony dia ny fisamborana, fitsarana ary fonja no miandry azy ary tsy miandry ela izany, sns... Ankehitriny, nangina tanteraka ny raharaha volamena voatana atsy Afrika Atsimo. Tsy heno intsony ny tohiny. Vao mainka aza ahiana ny hampivalona azy tantarakana noho ity resaka valanaretina vaovao ao aminy ity, ka hanidiana ny sisintany na ny habakabak'i Madagasikara tsy hifandray aminy. Zara aza ve misy an'izay tranga izay, hoan'ny tomponandraikitra? Fa anisan'ny mampieritritra fatratra ihany koa ny mpanara-baovao ny amin'ilay resaka fameranambola tsy nefaina tamin'ny mpampindram-bola Banky iraisam-pirenena. Lesoka tao amin'ny orinasa Jirama io tsy maintsy namerenam-bola io noho ny fitantana tsy mazava. Dia mbola hisy hihambo na hiaro ny fitondrana Rajoelina toy ny teo aloha ve fa mahay mitantana izy? Efa bontolo fotsiny izany raha mbola misy. Ny fanontaniana manitikitika ny olom-pirenena maro ihany koa, dia hoe: vola taiza na avy aiza no nalaina nahafahan'ny fitondrana namerina ny volan'olona? Ity firontrana Rajoelina ity na mihambo ho manambola aza, dia tsikaritra, indrindra ho an'ny mahalala fa sahirana ara-bola. Izay no tian'ny olom-pirenena ho fantatra sy ilàn fanazavana avy amin'ny fitondrana. Misy kitapom-bola nahabangana ve any an'anonanona any hisolo vaika ny akalana aloha? Mijanona ho fanontaniana tsy hisy valiny toy ny fanontaniana maro ihany anefa izany satria iarahamahalala tsara, fa ity fitondrana Rajoelina ity dia manao ho tompon-trano mihono ny vahoaka malagasy hatramin'izay naha teo amin'ny fitondrana azy izay. Maro ireo raharaha teto tsy nahitana fanazavana mihitsy avy amin'ny fitondrana. Tsy afaka hanao izany koa izy noho ny fototra tsy mazava niaingany hatrany am-piandohana, hoy ny maro.

Sôh'son

Fanaovan-dalàna

Nifarana omaly ny fivoriana arapotoana faharoan'ny Parlemanta

Nifarana omaly zoma ny fivoriana arapotoana faharoan'ny Parlemanta eto amintsika dia ny Antenimierandoholona, sy ny Antenimierampirenena izany. Ny tolakandro no nifarana ny teny Tsimbazaza, fa harivariva kosa vao nifarana ny tao amin'ny Lapa Maitso Anosikely, toeram-pivoriana ireo senateran'i Madagasikara. Anisan'ny nisongadina tamin'izao fotoam-pivoriana ireo depiote sy senatera ireo izao tamin'ity fotoam-pivoriana faharoa ity, ny fandanianana ny volavolan'ny lalànan'ny tetibolam-panjakana amin'ny taona ho avy 2022, izay azo lazaina fa toy ny taratasy nalatsaka nalefa amin'ny paositra ihany, tsy dia nisy ady hevitra loatra ny fandanianana azy, na teny Tsimbazaza, na tao Anosikely, satria maro an'isa ny mpomba ny fitondrana ao amin'ireo andrim-panjakana roa ireo. Ankoatra izany, nihaona tamin'ny governemanta ihany koa ireo senateran'i Madagasikara nialohan'ny fiakaran'ny fotoam-pivoriana ny alakamisy teo. Ny mpanara-baovao dia samy nilaza fa tsy nahaliana izany, satria ireo mpisolelaka no 100% mandrafitra ity andrim-panjakana etsy Anosikely ity, teny Tsimbazaza, mba nisy ady hevitra sy fanakianana ny fitondrana mpanatanteraka ihany, satria misy antoko mpanohitra ao, fa ny tetsy Anosikely dia fando-kafana sy fisaorana ary fisolelafana no be dia be nataon'ireo loholon'i Madagasikara.

Isembilo